



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma : f Tir Yimyim

Instagram tiryimyim@aolima

YouTube tir yimyim

TAPAK 8



US Tir Joe Biden-i 2024 election nübuyim sentong tenzükogo



Tottenham-i interim manager Stellini mapa nungi anentsü

VOL. XX NO. 193 (ADOK 193) DIMAPUR RASEMNÜ (WEDNESDAY)

RONGCHII (APRIL) 26, 2023

₹ 5.00

Japanese ambassador Suzuki-i CM Rio den ajurutep

Dimapur, April 25, 2023 Nagaland nung Japanese oshi nung kentenba angutsü ni kodanga meimla" ta Suzuki-i osangbener dang ashi.

Hiroshi Suzuki-i C-Edge College, Dimapur semdang. Iba college nung Technical Intern Training Program atema Japanese language training agir aser iba atema ARMS ajanga teyari agütsür.

"Kaketshir aika Japan nung mapa inyaksü aser skills angutsü imlar" ta Suzuki-isa ashi.

Nagaland nung ILP maparen akangkanga inyaksüla: NSF

Kohima, April 25, 2023 (TYO): Nagaland nung Inner line permit (ILP) akangkanga mebenshiba ajanga asen state ya ozüing alema arurtem tejenokdak ka kümogo, anungji state sorkari sensotem kümzüka ayutsü mapa inyaksüla ta Naga Students' Federation (NSF)-i metetdaksü.

North Eastern state tem nung ILP mapa shitak meinyaker aser Illegal Immigrants aruba ajanga lisopurtem asoshi lendong bentsür arur, ta NSF President Kegwayhun Tep aser General Secretary Siipuni Ng Philo nati sangdong ka nung ashi.

"Bengal Eastern Frontier Regulation (BEFR) 1873 akanga mebenshiba ajanga Naga lima ya ozüing alema arurtem jenokdak ka kümogo" ta parnoki ashi.

Tourist tem aruba tip atemtsü aser ozüing alema arurtem azioktsü atema ILP mapa akangkanga inyaksüla. ILP mapa inyaksü atema

Nagaland nung Japanese oshi nung kentenba angutsü ni kodanga meimla" ta Suzuki-i osangbener dang ashi.

Hiroshi Suzuki-i C-Edge College, Dimapur semdang. Iba college nung Technical Intern Training Program atema Japanese language training agir aser iba atema ARMS ajanga teyari agütsür.

"Kaketshir aika Japan nung mapa inyaksü aser skills angutsü imlar" ta Suzuki-isa ashi.

ochishir aser tasütait lennirtem nüngdaker, ta NSF-isa ashi.

"Iba ya asen maitsü, sobaliba aser tarutsü atema lendong tulu lir aser loktiliba samatsütsü. Iba lendong ajanga asen loktilibai tensa tamajung ka ajurutsü aser asen lima nung asenok minority akümtsü" ta parnokisa metetdaksü.

Nagaland sorkari online ILP system mapa inyakba mita repringtsü atema committee/ commission ka tentetstü akhanger, ta NSF-isa ashi.

NSF-isa federating units aser sub-ordinate bodies ajaki April 22, 2023 nü emergency federal assembly nung bangzüngtepba nung akanga noktaksü tetuyuba agütsüogo.

Pei pei telongtet nung bendangertem metetstü aser jangjatsü aser April 23, 2023 nungi tenzükur ita ana tsüingda NSF office nem census report agütsütsü bangjemtepba lir.

Angami kaketshirtemi Liquor Prohibition Act atema o atsüteptsü

Kohima, April 25, 2023 (TYO): Angami Students' Union (ASU) indang 30 buba biennial conference nung Nagaland Liquor Total Prohibition (NLTP) Act of 1989 benoka olemteptsü lemtetogo.

April 28, 2023 nü Chief Minister Neiphu Rio'er yimtsüing Toupheima nung iba mungdang tenzüktsü.

Iba mungdang ya April 28 nungi 30 tashi Tuophema Village Students' Union ajanga ketdangsüa amongtsü ta Conference organizing convener Kelhouneizo Yhome-i ashi.

Kohima nung tawa amongba G20 business meet nung bendanger dang yi ayoktsü temelaba agüja liasü saka iba ajanga Nagaland nung alirtemi NLTP Act indang tebilemba balala

lemsateptsü tenzükka liasü.

Anogo asemnü mungdang nung kaketshirtemi NLTP Act atema tebilembatem lemsateptsü, ta Yhome-i ashi.

ASU-i Nagaland Baptist Church Council (NBCC) pusema nungiter saka 'dry state' aser Act tashi aittsü atema inyaksü nüngdaker ta paisa ashi.

"Onoki Act anema menokdaker saka Act ya jembitsü mapang ka lir. Nagaland nung yi noktangkaka meimchir taküm aika yi ajemba ajanga samaogo" ta Yhome-isa metetdaksü.

ASU mungdang nung "If it is time to lift the NLTP Act" atema o atsütepa jembiba sülen chief minister aser state sorkar nem iba indang report ka agütsütsü ta paisa shisem.

PRIDE ajanga Nagaland nung MLA tem arangshir



Dimapur, April 25, 2023 (TYO): April 26, 2023 nü Parliamentary Research and Training Institute for Democracies (PRIDE) Lok Sabha Secretariat ajanga MLA tem asoshi orientation programme ka tenzükogo.

Iba sentong lapoka jembidang Nagaland Legislative Assembly Speaker Sharingain Longkumer-i PRIDE Lok Sabha Secretariat dang pelaba metetdaksü.

Taoba kümsük nungi Orientation Programme ka agitsü tejangraba liasü aser Speaker ama tanaben shimba sülen Budget Session nung iba onük benokdang Chief Minister-i anir züingsem ajaki iba tebilemba pelashishia agizük, ta Sharingain-i ashi.

14 buba Nagaland Legislative Assembly nung züingsem 60 nungi 29 tashi tejak tasentem lir. Tetsür MLA ana dena wadang balala nungi lennirtemi MLA tem ama tayongzükba aser tebilemstü khuret tasentem inyaka aotsü lir,

ta pai ashi. Nübertemi shimtetba MLA ka ama inyaksüba ya maongka ka lir saka iba maongka nung tebilemstü khuret tulu keta lir, ta Sharingain-isa metetdaksü.

Ozüing yanglurtem ama asenoki alima yimya melenshiba den putepa aintsüla aser angazüktsüla. MLA tem ya public aser sorkar tsüingda apu ka lir aser nübertem khurettem koktettsü atema lenmang bushiteptsüla, ta paisa ashi.

MLA tajung ka asütsü atema asenoki Constitution of India, House indang Rules of Procedure & Conduct of Business, House indang practices & conventions amala jungjunga metetstüla ta NLA Speaker-isa metetdaksü.

Nagaland-i State Assembly nung National e-Vidhan Application (NeVA) programme tenzük aser iba ya linük nung mezüingbuba lir. Sorkar ketdangsürtem teyari ajanga state tejakleni aoer, ta paisa ashi.

Nagaland Legislative

Assembly-i information technology tejakleni aoba den liromedema Budget Session (March 2022) mapang National e-Vidhan Application (NeVA) tenzük, ta Sharingain-i ashi.

Lok Sabha Secretariat nungi Vinay Kumar Mohan Joint Secretary-i anir PRIDE team members ajanga anogo ananü Orientation Programme nung onük balala angazükdaksütsü imlar ta paisa ashi.

PRIDE nungi shisalem sayurtemji Joint Secretary Vinay Kumar Mohan, taoba Joint Secretary Ravindra Garimella, Director Santosh Kumar, Additional Director Partha Goswami aser Additional Director Sovan Kumar Ganguli nunger lir.

Iba sentong nung mendenji Additional Secretary, NLAS Jenny Ndang liasü, State Chaplain Rev. T W Yamyap Konyak-i temoatsü meshia sarasadem aser Secretary in-charge, NLAS Khruohtuonuo Rio-i tesentepertem pelaa agizük.

Nagaland nung Malaria ajemogo: H&FW department

Kohima, April 25, 2023 (TYO): Nagaland nung Malaria positive cases kanga ajema kümogo ta health department ketdangsür kati ashi.

2009 küm nisung 8479 dak Malaria puteta liasü saka 2022 nungbo 5 dang liasü. Külen, 2009 küm nisung 35 asü saka 2022 nungbo tasüba ka danga maliasü ta State Programme Officer, National Vector Borne Disease Control Programme (NVBDPC) Dr Neisakho Kere-i ashi.

Mongulbarnü World Malaria Day indang sentong agidang pai iba osang metetdaksü.

2005 nungi 2022 tsüingda Malaria positive cases teimba putetbaji 2009 küm nisung 8,479 dak putetba liasü. Ajisüaka 2022 küm nisung 5 dak dang putet aser Dimapur, Kohima, Peren o Phek dak alaka

tanüingba district tem nungbo meputet, ta Dr Neisakho-i ashi.

Nagaland nung Malaria ajanga asübaji 2006 nung nisung 75 aser 2009 nung 35 liasü saka 2016 küm nisung ka asüba sülen 2017 nungi 2022 tashi tasür ka danga maliasü ta paisa ashi.

2009 küm Malaria Pf cases 2893 liasü saka 2022 nungbo 2 dang liasü ta paisa shisem.

India-i 2030 tashi nung zero Malaria cases atongtsü alizüing lir aser Nagaland nunga district 8 nung positive cases mali, ta paisa metetdaksü.

"Nagaland nung National Centre for Vector Borne Disease Control ajanga malaria-free Nagaland kümdaksütsü atema mapa inyaka arur" ta Health & Family Welfare Department Principal Director

Dr. Vibeituono M. Sachu-i ashi.

Nagaland nung World Malaria Day amongdang malaria ajanga temang, lokti aser rongsenketzung nung kongshiba osang prokshitsüla ta Commissioner and Secretary, HFW, Y. Kikheto Sema-ia ashi.

2030 küm malaria samatsütsü atema inyakdang Nagaland nung awareness campaign aser lokti ajaki shilem agiba cleanliness drive inyaksüla ta paisa ashi.

Kohima district health centres kübok Accredited Social Health Activists (ASHA) asem- Lerie sub-centre nungi Chichabeni, AG sub-centre nungi Temsujungla aser Rusoma sub-centre nungi Keneiphrenuo nunger nem sempet agütsü.

Mokokchung nung World malaria Day amung



Mokokchung nung World Malaria Day sentong agia tembanger kelen tongti tesemdanger Mokokchung Deputy Commissioner & Chairman District Task Force for nü Malaria Elimination Shashank Pratap Singh IAS aser malaria department pur aser sentong nung shilem agirtem tangokba noksa.

Mokokchung, Rongchii/ April 25(TYO) : Alima ajunga den külemi Mokokchung nunga tanu World Malaria Day "Time to deliver malaria : invest, innovate, implement" omen nung ajemdaker mungogo.

Tanu iba sentong nung tongti tesemdanger Mokokchung Deputy Commissioner & Chairman District Task Force for nü Malaria Elimination Shashank Pratap Singh IAS-i jembidang 2019 küm nungi tang iba anogo tashi

mokokchung district "Malaria Free Zone"kümdaktsütettsüsa inyakba asoshi Malaria department nung inyaker aser yimtsüing nung ASHA-tem nem tenungsang agutsürta ashi.

Mokokchung district ya Assam den artsü süa lir, anungji kanga dang kumdangtsüla, iba tashidak nung jenbua alitsü asoshi tetsütem kanga dang meita aser kumdanga alitsüla, kechi aser iba tashidak yagi tanur dak tama kongshirta Shashank Pratap Singh IAS-isa

tekümdangtsü olen ka metetdaksü

Mokokchung Deputy Commissioner & Chairman District Task Force for nü Malaria Elimination Shashank Pratap Singh IAS-isa iba tashidak anema raraba mapatong nung distrist administration akokba lenmang ajak nung yariteptsüta ashi.

Nüburtem Malaria tashidak nungi jenbua lidaktsütsü asoshi maparen balala inyakba asoshi World Malaria Day nungtem nung ASHA-tem nem sempet aguja liasü aser iba sempet Chubatola Chakpa, Sünepmongla Longmisa aser Toshinano Lakhuni par aseme agizük.

Kasa sentong nung Malaria tashidak indang terateta tejangja aser Mokokchung nung Malaria jenjang indang tajangja District Vector Borne Disease Consultar Imkummongba Nungtang-er-ashi aser iba sentong Assistant Malaria Officer Kenito ketdangsuba nung agi.

NASTEC ajanga Intellectual Property Rights indang workshop ayongzük

Kohima, Rongchii/April 25 (TYO): Naga nung traditional aser sobaliba dak sendakba osettem meshidaki amshiba asoshi süoki ia bilema Nagaland Science and Technology Council (NASTEC) ajanga Hombarnü Intellectual Property Rights (IPR) indang nung state level workshop ka ayongzüka liasü.

Iba workshop ya Government of India, Department of Science & Technology indang Technology Information Forecasting and Assessment Council (TIFAC) den lungjemer Capital Convention Centre, Kohima nung ayongzüka liasü.

Iba sentong tenzüka jembidang Nagaland government Secretary aser Chairman NASTEC, Hohuli K Chishi ajanga ashiba agi, Naga nungertem ya tamang katetba tangatetba nung ajemdaker tongmelangi agi lia arur aser pei temeden mejangja aser junga mebendenba yong yimya tajung aika samaogo.

Anungji asenoki temeden

angazüktsüla aser Naga nung sobaliba wazüka ayutsüla, ta lai ayongzüka liasü.

2011 küm TIFAC teyari nung Patent Information Centre (PIC) ka Nagaland nung amenok aser iba yagi küm ter tsüingta mapa tulu inyakogo aser awareness sentong noklang aika agia state nung institution pezü amenok. Nagaland University nunga PIC cell ka yakta amenoktsü, ta lai ashi.

Nagalend nungi GI (Geographical Indication) tagged products pezü aliba den ano Ao aser Angami shawls atema license/copyright bushiba mapang lir, ta lai metetdaksü.

Iba sentong ayongzükba nükjidong indang lemsatepba mapang, Head, IPR Division, TIFAC, Dr Yashawant Dev Panwar-i ashiba agi, GI registration ya agiba sülen shingai GI tagged product tem meyanglutettsü mesüra meyoktetsü.

Item temeden ya yangi alirtem atema dang aser item temeden

ya belenshitsu makok, ta pai ashi.

Scientist 'D' at NASTEC aser programme coordinator, Dr Nesatalu Hiese-i iba sentong nung jembidang, GI tag süa aliba Chakhesang shawl mashi lenmang nung amshiba ama sobaliba tsütsü tim masüba mapa inyakba jenti lir, ta sasasetta ashi. Chakhesang kin asoshi sobaliba tsütsü tim masüba inyangsangshi ken o ana lir, anungji ajaki pei temeden metettsüla aser pei oset kumzüka ayutsüla, ta lai ashi.

Technical session mapang Shri Mata Vaishno Devi University nung taoba VC aser DMS, IIT Delhi nung taoba tekolak, Professor SK Jain-i IPR indang onük nung jemi, Dr Indira Banerjee, Attorney, PS Davar & Co., Kolkata ajanga India nung patenting system aser Novelty Assessment indang jemi aser Dr Panwar-i IP in North East aser Copyright Management in Academic Institutes indang onüktem nung jembia liasü.

GMS Sabangya Compound nung angati dental camp ayongzük



Dimapur, Rongchii/April 25 (TYO): Oral Cancer Screening month nungtem nung angati dental camp ka Govt. Middle School, Sabangya Compound nung April 25, 2023 nü ayongzüka liasü.

Iba camp ya National Oral Health Programme (NOHP) ajanga Iva Healthcare Ltd. & Renascent Pharma den lungjemer ayongzüka liasü.

Oral Cancer indang

awareness aser Oral health junga anepalutsü atema Dr. Sentirenla ajanga iba sentong nung jembidang, tepang junga anepalutsü aser moko aliba oset nungi pila alitsü ayongzük aser tepang junga anepalu masüba ajanga timtem ajuruba indang lemsatepba liasü.

Oral cancer adokdaksüba aser tebo junga anepalu masüba ajanga timtem balala adokdaksüba indang lai kaketshir nem angatetdakja

liasü. Medical team ya Dr. Taliwaba Ao, Senior Dental Surgeon IMDH lenisüba kübok liasü aser parnoki tanurtem angati yaria liasü.

Iba camp nung Sabangya PHC staff aser GMS Sabangya nung tesayur temi yaritepa liasü.

Iba sentong nung kaketshir nem toothbrush aser toothpaste densema oral hygiene kit tem angati lema agütsü.

Nagaland Board of School Education ajanga metetdaksür

Dimapur, Rongchii/April 25 (TYO): Nagaland Board of School Education ajanga sangdong ka nung ashiba agi, Para-Medical/Agri aser Allied degree Courses tem atema Nagaland State Entrance Examination (NSEE) 2023 agütsü.

Iba Nagaland State Entrance Examination ya May 17, 2023 nü agütsü aser tatidang mapang ghonda asem (3) alitsü.

Iba tatidang mapang question paper nung items/questions 180 alitsü aser ajakji Multiple Choice Questions (MCQ) dang alitsü.

Tasüngdangba ya tang amshiba NBSE indang Class XI & XII (Common Core syllabus) of Science stream syllabus nungi renemtsü, ta sangdong ajanga ashi.

Subject shia tasüngdangba telemsa yamai alitsü:

- (i) Physics - 45 items
- (ii) Chemistry - 45 items
- (iii) Botany - 45 items
- (iv) Zoology - 45 items

NSEE 2023 atema Admit Cards tem online ajanga download sütettsü aser mapangtong nung anogo tejangja metetdaksütsü.

Dimapur nung World Malaria Day amung



Deputy Commissioner-i ASHA ka nem sempet agütsüba noksa nung angur. (Dimapur, April 25, 2023)

Dimapur, Rongchii/April 25 (TYO): Dimapur nung CMO indang Conference Hall nung April 25, 2023 nü World Malaria Day munga liasü.

Iba sentong nung Deputy Commissioner aser Chairman, DTF for Malaria Elimination, Sachin Jaiswal-i ashiba agi, ramen ya alima ajunga tebilemstü lir saka küm ishika tsüingta temelenshi angur.

Pai ramen prokshiba indang teratet ashi aser danga district tem dak alaka ita 12 prong merila sü amshiba district ji Dimapur ya dang lir, ta pai ashi.

Dimapur nung ramen agi shirangba ajema akumer aser lipajen temerekba kumdaktsütsü aser libaliru yimyatem melenshitsu nungdaker, ta pai ashi.

Paisa department dang awareness sentong tali ayongzüka agütsütsü ajungshia liasü.

Peter Sangtam (District VBD Consultant) ajanga iba sentong indang tongmelang agi rateta ashi.

Blocks ajak nung ramen ya 2027 tashinung samatsütsüla, district ajanga nung 'indigenous transmission of malaria' anendaktsütsüla aser samatsür alidak ramen tanaben madokdaksütsü mera agütsüla, aser 2030 tashinung Dimapur ya ramen maliba district ka kümdaktsür alitsüla, ta pai ashi.

Iba sentong nung Early Diagnosis aser radical treatment amala maparen inyakba osang agia liasü. Iba mapang Active Surveillance aser SW survey ama case-based surveillance tem agi, ASHA ajanga yimtsüingtem nung nisungtem dak ramen tendang, Passive Surveillance mesüra shiranger temi health unit tem semdanga angati tendanger anepaluba aser ramen pokteta alidak telangzüba agütsüba tem alitsü.

Iba sentong nung Dr. A Kavito Zhimomi (DPO CD-I/ DSO) menden liasü, aser best performing ASHAs sempet Latika, Katoli aser Kughali Achumi nung nem agüja liasü.

Mizoram nung sen crore 3 jenjang temesepba mozü apu

Aizawl, Rongchii/April 24 (Agencies): Mizoram police aser Assam Rifles lungjemer Aizawl nung sen crore asem jenjang Methamphetamine süngjang 14,600 (seret 1.46) pua liasü.

Iba mozü ya arishi küm 35 tain tebur kati bena liasü aser pa puogo, ta Mizoram police-i ashi.

Osang kar lazükba nung ajemdaker Aizawl nung aliba Special Narcotics Squad Police Station nungi police kar aser Assam Rifles züngsem temi

lungjemer Mizoram yimtiba, Aizawl northeast tsütsü Falkland Veng area nung operation ka agia liasü.

Iba mapang Champhai district, Mizoram kübok Kanan Veng nung alir Lianchithanga ket nungi international market nung sen crore asem jenjang Methamphetamine süngjang 14,600 ya nguteta liasü.

Iba mozü bena alisang anema Narcotics Drugs and Psychotropic Substances Act kübok ken o ka benoka lir, ta Mizoram police ajanga ashi.

Abhishek-i TMC indang campaign tase nba tenzükogo

Kolkata, Rongchii/April 25 (Agencies): TMC lenir Abhishek Banerjee-i Mongolbarnü ashiba agi, West Bengal nung Lok Sabha menden 42 atema election ya, BJP-i tamangba yimsü aser lokti tentetba balala dak ajemdaker inyaknuba ama masü saka terenlok balala asoshi rangloker agitsü.

Banerjee, shibai state nung taruba rural election dak ajemdaker Cooch Behar district nungi outreach campaign 'Trinamool ey Nabajowar' (new wave in Trinamool) tenzükja liasü, pai TMC-i state nung nüburttem indang panchayat ka yangertsü sentong lir, ta ashi.

"West Bengal nung taruba Lok Sabha elections ya lenla balala nung terenlok dak rangloker agitsü. Election ya BJP-i aginüba ama communal polarization ken o dak ajemdaker magitsü. Parnok tsükdaktsütsü nüngdaker. Onoki state nung aliba nüburttem temeden atema inyaktsü," ta pai rally ka nung o jembiba mapang ashi. Linük nung Lok Sabha election ya 2024 küm agitsü lir.

TMC indang national general secretary Banerjee-i, iba outreach campaign sentong ya Dinhata assembly constituency nung temple ka

nungi tenzükja liasü. Iba tesem nung pai nüburttem den sensak asem aser parnok tebilemstütem angadanga liasü. "TMC kijai nenok temeden atema raratsütsü. Centre nung BJP-i aniba sorkari MGNREGA scheme kübok fund tem sota yua lir, kechiyong parnok 2021 küm assembly election nung tamakok angubatang tashi magizükteti lir," ta pai ashi.

Ita ana tashi iba sentong ayongzükja agiba mapang Abhishek-i state nung km 3,500 shi ayimjema tesem balala semdangtsü aser rally 250 dak tema ayongzükja agitsü.

Taoba mapang pai ashiba agi, iba outreach campaign nükjidongji nüburttem den tali sendakteptsü aser panchayat election nung TMC candidate tem nem vote agütsüdaktsütsü asoshi nüburttem nem tangazükba agütsütsü asoshi lir.

"Iba amala inyakyim ya tang mezüngbuba linük nung ayongzükja agir. Nenoki sorkar kümteter aliba party kati iba amala sentong ayongzükja agiba mangutsü. Ajisüaka democracy nung nüburttem ya ajak dang tongtibangba ta onoki amanger. Nenoki shimba candidate tem nem party-i nomination agütsütsü," ta pai ashi.

UP Mayor election atema BSP-i Muslim nunger 11 nominat asütsü

New Delhi, Rongchii/April 25 (Agencies): Uttar Pradesh nung mayor election atema Bahujan Samaj Party-i nomination 17 nungi 11 Muslim nunger candidate nem agütsüba ya Samajwadi Party indang Muslim-Yadav vote bank lemdangtsütsü asoshi agiba jenjang ka ama reprangteter aser iba ajanga taruba küm Lok Sabha election atema Mayawati-i aniba telok tasa tera metetdaksüogo.

Congress aser Samajwadi Party-i, iba jenjang agiba ya vote lemdangtsü asoshi agiba jenjang ka ta shiogo, saka BSP lenir kati ashiba agi, par party-i Muslims nunger shidakba pusemba sayutsü atema iba jenjang agi. Urban election ya shilem ana kuma lemsar May 4 aser May 11 nü agitsü.

BSP-i, Lucknow, Mathura, Firozabad, Saharanpur, Prayagraj, Moradabad, Meerut, Shahjahanpur, Ghaziabad, Aligarh aser Bareilly municipal corporation tem nung mayor mapa atema Muslim nunger candidate tem shimogo.

Kasa mapang nung SP aser Congress nati Muslim nunger candidate pezüzü dang shima lir. BJP-i mayor menden atema Muslim nunger candidate ka danga meshim.

"BSP-i Muslim nunger nem kechiba ticket paika ya agütsü aji voter ajaki meteta lir. La (Mayawati) kijai takok mongutetsü anungji iba jenjang agiogo," ta Samajwadi Party otongdar Rajendra Chowdhary-i ashi.

"BSP ya BJP indang B-team lir aser iba ya vote lemdangtsü asoshi parnok tasa lir. Ajisüaka iba tasa ya ajaki jangja lir," ta pai ashi.

BSP dang nungi SP-i Muslim nunger ishiba shimba indang jembiba mapang Chowdhary-i ashiba agi, party-i ajak kanga junga asadanga telemtetba agiogo.

Kasa mapang nung Congress lenir Naseemuddin Siddiqui-i ashiba agi, "ni Behenji (Mayawati) aser BSP jangja aliba ama shingaia jangja mali. Iba amala tasa benoka inyaksangshiba mapang party kanga mejungi tamakok ngua aruogo. Uttar Pradesh nung Muslim nunger shilem 20 lir aser onoki (Congress) menden 17 atema Muslim nunger candidate pezü shimogo, koba shilem 23 dak tema lir," ta Siddiqui-i ashi, shiba Mayawati-i aniba sorkar nung minister ka liasü.

2017 küm mayor menden 16 nungi BJP-i 14 aser BSP-i ana koka liasü.

PM Modi-i Vande Bharat train, water metro project tenzüktsüogo



Thiruvananthapuram nung project balala lapoktsüba mapang PM Modi, Kerala Angh Arif Mohammad, CM Pinarayi Vijayan, Congress MP Shashi Tharoor aser Union Minister for Railways and Communications Ashwini Vaishnaw nunger tangokba noksa nung angur.

New Delhi, Rongchii/April 25 (Agencies): Ato Kilonser Narendra Modi-i anogo ana atema Kerala semdangba mapang state nung mezüngbuba Vande Bharat Express train Mongolbarnü tenzüktsüogo.

Modi-i iba train ya Thiruvananthapuram Central Railway station nungi 11:10 ako nung tenzükja liasü.

Railway station platform 1 nungi iba Vande Bharat Express metenzüktsü tsüngdang pai train telung nung school tanurtem den sensaksema liasü.

Train nung kaketshirtem den sensaksema mapang Kerala Angh Arif Mohammed Khan, Chief Minister Pinarayi Vijayan aser Congress MP Shashi

Tharoor nungera densema liasü. Tanurtemi Modi dang parnoki yangluba pa indang painting aser sketches tem sayua liasü.

Kasa mapang nung PM-i train tenzüktsüba mapang nüburttem noklang aika adenshir liasü.

Vande Bharat Express ya semi-high-speed train ka lir aser iba yagi state yimtiba aser Kasaragod district na sendakteptsü. Mezüngbo iba tesem ana sendakteptsü atema ghonda 12 nungi 13 tashi agia liasü saka tangbo ghonda ti dang agitsü.

Maneni train yagi Kollam, Kottayam, Ernakulam, Thrissur, Palakkad, Pathanamthitta, Malappuram, Kozhikode, aser

Kannur ajanga sütsü. Kasa mapang nung Modi-i project aika tenzüktsüogo kong linük nung mezüngbuba Water Metro Kerala nung tenzüktsüba densema lir. Kochi water metro yagi yimti temeket nung aliba asetkong 10 sendakteptsü. Iba project atema Kerala sorkari senotsü teyari agütsü aser German firm KFW-i achaayangtsü.

"Water metro nung onoki most advanced Lithium Titanite Spinel batteries amshir. Tang mezüngbuba public section nung taziokba ka kübok electric hybrid rongtem fleet ka ama inyaksangshitsü," ta Kerala Water Metro Limited, general manager (operations) Sajan P John-i ashi.

CM Kejriwal-i Websites tase n 180 tenzüktsüogo

New Delhi, Rongchii/April 25 (Agencies): Delhi Chief Minister Arvind Kejriwal-i Mongolbarnü Delhi sorkar kübok department 50 atema websites tase n 180 lapoktsüogo aser nüburttem nem service balala tajungba agütsütsü asoshi artificial intelligence amshitsü nüngdakba lemsatepa liasü.

Website lapoktsüba department tem rongnung transport aser public works department tem densema lir. "Department 50 atema website 180 ya Delhi sorkar indang portal ka nung dang ajak inoka lir. Website tejentem technology tejen amshia inyaksangshia liasü aser item website tem tab

friendly masü asü." "Tang onok cloud storage dangi meyipogo aser server system aginogo. Server crash asüba ojang dang ataloktsü. Item website tem nung latest technology lir aser bandwidth o space peria lir," ta website lapoktsüba sentong nung CM-i ashi.

Item website tem ajanga nüburttem tenüngdakba peritsütsüla ta shia Kejriwal-i, Artificial Intelligence ya tarutsü nung technology tongtibangtiba akümtsü aser nüburttem nem service tajungba agütsütsü atema sorkari iba ya koma amshi nung ajungtsü aji asadangtsü nüngdaker, ta ashi.

Delhi Revenue aser Finance Minister Kailash Gahlot-i ashiba agi, website tem tatemsa küm 15 tejakdang upgrade süa liasü aser nüburttem aikati amshiba mapangbo glitch süa aruogo.

"2007-08 küm sülen tang mezüngbuba websites tem upgrade süogo. Item sorkar sites tem liasü aser nüburttem aikati amshira crash süa liasü. Ajisüaka site tasentem nung second shia nisung lakh ishikati amshia crash masütsü. Item site tema ya mobile nunga ayong ayonga amshitetsü. Tanü tendak technology tem benoka amshitsü nüngdaker," ta pai ashi.



AICC General Secretary Priyanka Gandhi Vadra den Congress lenirtem Mysore district nung Karnataka Assembly election matong tsüngda lokti senden ka nung tangokba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, RONGCHII (APRIL) 26, 2023

Dimapur district ya kong adener?

- P Tiamongba Aier

Dimapur district nung ozüng alema aruba nisung aika lir ta media osangtem prokshiba nung ajemdaker Dimapur Deputy Commissioner Sachin Jaiswal-i tawa tu senden ka amen aser iba sülen April 19, 2023 nü Inner Line Permit (ILP) inyakyim tenzüksü osang metetdakja liasü. Iba ya tepelatsü osang ka lir aser Naga nunger lokti tentet balalai mapang talangka nungi aginüa aruba onük ka lir. Ajisüaka, teratatsüka aser ano tesüngmangtsü osangji Nagaland sorkar ajanga Dimapur district ajunga nung Inner Line Permit (ILP) inyaksü tenzükba atema Assam nung telok kari ola adokba lir. Citizens' Rights Preservation Committee (CRPC) ta aser Assam nungi NGO kati Dimapur district nung ILP magizükba osang metetdaksüogo. Dimapur ya shishilembaba tesem ka aser nisung temeyoktep lir aser 'mini India' ta ajar aser Dimapur nung Bengali, Bihari, Marwari, Punjabi aser tanga oshi jembirtem küm aika liyonga arur ta CRPC-i ashir. April 19, 2023 nü Dimapur DC-i ILP sangdong agütsüba ajanga lisopur lakh 1.5 atema terata ka adoktsüogo ta CRPC-isa metetdaksüogo. Iba nung ajemdaker parnokki Dimapur nung dang masü saka Manipur nunga ILP inyakyim agientsü akhanger ta parnokisa ashi. CRPC-i ashiba olen yagibo Dimapur district ya Assam kübok ang dena lir ama angateter anungji Nagaland state sorkar aser Naga nunger lokti tentetemi iba o ya meyiptsütsüla asü, state sorkari kanga dang ajungbena December 2021 nung taoba Dimapur district nungi Chümoukedima aser Niuland district tem razüka yokba nung tebilemdangtsü ka lir? State sorkaribo tarutsü nung tang lateta aliba Dimapur district atema timtem ajurutsü meteta iba mapa ya inyak asü? Külen, April 24, 2023 nü United Naga Tribes Association on Border Areas (UNTABA)-ibo sangdong ka nung Assam kübok Diphu, Nagaon, Golaghat, Jorhat, Tinsukia aser Dibrugarh district tem ya Nagaland state kübok dena liasü ta kuli agütsüogo. Iba kuli ya putiotsü record balala ajanga metentsür aser tanü Assam kübok aliba tesem aikati Naga nunger ali kiburtem nem tax/tribute agütsüba kulitem lir. Anungji state sorkari CRPC nem o meyiptsütsüla aser tekaratiba nung Dimapur district nung ILP inyakyim tenzüksüla. Maneni, Naga nunger kin hohotem anir telok balalai Nagaland ajungalen nung ILP maparen akangakanga inyaksü atema rongshitsüla aser akokba tashi yariteptsüla.

OLEMSABANG

ASEN JABASO-JALAJI ASE NOKSA LIR

- L. Kika Pongener.

Asen jabaso jalaji asen noksa lir, kechiaser tsürabur kechi aji chirnurtemi sayutsü. Tsüraburtemi mapa tajung inyaka ochishia lira, iba senmang tajungji chirnur aser semchisemnur tashi amangtepyonga aotsü. Sungdong jungra iba sungjangji ajungtsü, saka sungdong mejungra iba sungjang-jia majungtsü; kechiaser sungdongji kechi aji pei sungjang agi meteter (Mathi-12:33). Tetsü-tebuoi tasen chira chirnur aser semchisemnur tashi tepo mejemtsü (Ezekiel-18:2). "Ozü tsüraburtemi temenen mena, aser parnok joko mali, aser onoki parnok tai temenen khu abener" (Aiatai-5:7). Sungdong ajak nungbo sungjang tajung matanger, sungdong kar nungbo sungjang tarak keter tachitsü mejungi tangteter. Asenoki iba sungdong telung nungji lep-poka reprangdangra, ashiko iba sungdongji tila asüdong nok agi leptur tarak keter indaktsüba asütsü akok, mesura ali telung nung tera ayangdak mesen (Worm) agi chir alitsü akok, mesura sungjang atangtsü teben apongba mapang mesen aiba asütsü akok. Aji oda, ibala timtem jagi sungjangji tarak keter tachitsü mejungi tangteter. Yamaji asen nisunger libaliro nunga tsürabur libaliro mejungra jala jabaso tajung mesotettsü. Tsürabur ashi-aer sura chirnur-a ashi-aer sotettsü, tsürabur ashi-külak nisung sura chirnur-a ashi-külak sotettsü. Tsürabur yimden, arogo aser lokti nung ketdangsuba nung ochimashi sura chirnur kasaji sotettsü. Tsürabur yimten, arogo aser lokti raksatsür nisung sura chirnur-a kasaji sotettsü. Yamaji tsüraburi taküm junga melitetra, tia makar karbo chirnur sopet-tangpet aser mata-mabensa sotettsü. Yisui ashi, "Kechiaser sungdong tajung nung sungjang tamajung matanger, mesura ano sungdong tamajung nung sungjang tajung matanger. Kechiaser sungdong shiaji pei sungjang agi meteter. Kechiaser ayidong nungi nisungi mongu maonger, mesura korishidong nungi parnokki tsükmenatsüjang maonger" (Luk-6:43-45). Tasendong nung tasenjang atangtsü aser takodong nung takojang atangtsü". Yisui ashiba ama Sungdongji kechi'ar sungjang jagi sayutsü.

Anungji tangari metet-aka, memetet-aka, ngu-aka, mongu-aka, asenoki indangindanga ochishia alitsüla. Asenok adenba aser tenzükba lokti ajak nung tangari asen dak tajung chitettsüsa aser tatishitsü tajung angitsüsa asenok takümji alitsüla. Asen nem nungloktsüba mapa nung tangari mashishitsüsa aser temulung lemtettsüsa inyaksüla. Yamaji asenoki asen azü (Blood) memeneni, asüngteta yutetra, asen dak nungi chirnur tajung alima nem tajangzük agütsüba watsü-wabong tajung sotettsü. Asen jabaso-jalatem ya asenoki asenok nem odang moatsüba amai zübazüba bilemer, saka item chirnur ya nu menden nungi Tsüngremi asen nem senmangtsü asoshi balaka renemer yokba senpet lir. "Angang chirnurji Kibuba nungi anguba senmang lir; aser nu menden nungi tejangji pa senpet lir" (T.Ken-127:3). Atangji tetsürtem-ia "Nu Menden"-ji asüngteta merukteta meyura, chirnur tajung mesotettsü, kechiaser chirnurtem ya nu menden nungi Tsüngremi asenok asoshi senpet balaka renemtsüba lir. "Nisung shia shibai Kibuba tsüngken tsübur, shibai pa lenmang nung jajar, pa tepelatsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Alima nung tanurtem indang Bible App amshir million 100 jungogo



Rongchii/April 25, 2023 (Agencies): Tanurtem Tsüngrem O nung aintsü asoshi ajungmesotsü nükjidong nung yangluba Bible app ka tangbo nisung million 100 dak tema ket nung lir.

2013 küm YouVersion ajanga alima nung tamangba yimsü dak ajemdaker tentetba organization, OneHope den lungjemer Bible App for Kids ya yanglua liasü. Parnok nükjidong ya tanurtem Laishiba amshitsü

asem itemji takum nunga amshidaksütsü liasü.

Iba app yanglur küm ter jungogo aser tangbo iba app yanglur temi iba app amshir million 100 ajungba benjonger.

"Tanur ka takum nung tongtipangtipa shilemji parnok kibong lir ta asenoki meteta lir. Ibaji temolung nung yur, alima nung kibong million aikati Laishiba dangi meyipba aser külemi Tsüngrem indang angazükba ngua onok kanga

ajungmesor," ta YouVersion founder aser CEO Bobby Gruenewald-i ashi.

Alima nung nisung million aikati iba app ya amshir aser iba app ya Spanish, Chinese, French, Polish, Mongolian, aser Swahili ama oshi aika nung meyipzüka lir.

"Iba Bible ajanga linük shia tanurtemi Tsüngrem O meimba asenoki angur. Alima nung arogo balalai tarutsü putu nem Laishiba nungi otsü agiteta lemsateptsü aser tarutsü nung tanüla tsütsü aintsü asoshi tamendak dak yanglutsütsü onok tejangraba lir," ta OneHope tir, Rob Hoskins-i ashi.

Bible App for Kids nung Laishiba nungi tongtipang otsü 41 amshir aser tanurtemi Tsüngrem o pei medemer den lemsatepba nung yarir aser tsürabor, pastor aser arogo lenirtem nem resources agütsür.

"Onoki Bible App for Kids amshitsü jangrar aser tanur indang ministry indang curriculum den apeter," ta San Jose, California nung Life Valley Community Church nungi Melissa Glynn-i ashi.

"Tawa tanur tetsü kati lar tanuri ki sema Joshua 1:9 zünga jajaba otsü küdang ashi. Iba app ya ajanga tanur takum nung kongshir aser itemji asen arogo asoshi temoatsü lir," ta Glynn-isa ashi.

ANOGO ABEN TSÜNGREM DEN

Tenla agütsüba ajanga tenüng asangba (T.Ken 100:4)

Tejen Lai mapang nung Tsüngremer nüburi shiruru tenla sabangi bener arua Tsüngrem nem tenla agütsü. Tanü asenoki Kibuba shiruru tasü masü, asenoki taküm aliba tenla Kibuba nem agütsür. Laishiba nung Tsüngrem nem tenla agütsüba balala indang jembir.

Tenüngsang agütsüba tenla (Ibri 13:15). Kodang asen tebang agi Pai kechi inyak aser Pa shiba indang tenüngsang jembidir, asenoki tenüngsang agütsüba jagi Pa peladaksür. Temulungjang teraksa tenla asenoki agütsür (T.Ken 51:17). Asenoki asen temang taküm aliba tenla ka ama Pa nem agütsütsüla (Rom 12:12). Mapa tajung tenla agütsüba lir (Matt. 5:16; Ibri 13:16). Tenla agütsüba tenla lir (Fil. 4:18). Kodang asenoki asen sen, mapang, rongsen aser tashi tangar den lemsatepdir, asenoki Tsüngrem dangi tenla abener.

Nai Pa sentsüwangshi asoshi tenlar asü masü ne taküm reprangdangang. Teinyaktsü mapa aika atadagi, aser tejangja mapa kar inyaktsü nübusen ka asütsü akok.

Tsüngremi nai inyaktsü yuja aliba mapa inyakdakji nai metetta lir ma? Pai agütsüba sempetji nai amshidir ma? Ne tenüng asangba tenla Tsüngrem nem agütsüdir ma? Pa nem sentsüwangshi bener arutsütsü aser tangar tenzüksü ne tenüng asangba tenla Tsüngrem nem agüjang.

Pakistan nung tamanger amitsür ka anema ken o benok

Lahore, Rongchii/April 25 (Agencies): Pakistan nung asaa koranic verses aliba kaket tem rondoktsü ta tai tonglokja tan ita Khrista dak amanger amitsür ka aser Muslim nunger atsü anepalur ka apu, ta ashir.

Punjab Province nung Pakpattan District kübok 66-EB village, Arifwala tehsil nung aliba Government Girls Higher Secondary School ka nung April 15 nü storeroom mürekba mapang arishi küm 46 tain Mussarat Bibi aser Muslim nunger Muhammad Sarmad dak iba tai tongloktsü, ta attorney Javed Sahotra-i ashi.

"Mapa inyaker anaprong dang paper aser danga osettsüset agi sünga aliba storeroom mürektsü ashi. Tenati paper tejen aser danga osettem school indang kinük külen bendener mi senloktsü. Mapang tatsüka lir kaketshir temi rondoker alidak Islam asoshi temeshi kaket indang tapak kar aliba jangjatet," ta Sahotra-i ashi.

School indang principal Nasreen Saeed densema staff temi Bibi aser Sarmad nati asaa Koranic kaket marong ta meteta lir, aser Pakistan indang blasphemy laws kübok nükjidong jangjatsü shia lir, ta Sahotra-i ashi. Kaketshir aser tesayur kari anema nokdak, saka principal aser staff kari

parnok süngzüksütsü merang.

April 19 nü yangji alir Muslim nunger Kashif Nadeem-i police helpline nung call asü aser Khristan tsürlai koranic pages rondoka tamangba yimsü mezüngmeshiogo ta tai tongloktsü.

Nadeem-i Khristan tsürla tenüng dang ashi saka kaket nung mi senloktsüdak atsü inyaker (gardener) ya densema lir ta police temi bushitet, ta First Information Report (FIR) nung shia lir.

"Ken o agütsüri school kima nisung telok ka aniden aser iba tatalokba anema longkak ait. Mussarat aser Sarmad nati kaket ya asaa arongba masü, kechiaser tenati azüngtsü aser zülutsü memetet ta school indang principal aser tesayurtemi shiaka longkak aiter temi tensa tamajungba mekumdaksütsü mechi police temi tena apu," ta Sahotra-i Morning Star News dang ashi.

Khristan tsürla asoshi okatsür Lazar Allah Rakha-i Morning Star News dang ashiba agi, police temi blasphemy statutes indang Section 295-B kübok Bibi aser Sarmad anema ken o benok aser tena Pakpattan jail nung yua lir. Section 295-B nung, shibai molungsoa Koran raksatsür, mesüra iba kaket nungi agiteter mesüra mapa

tamajung asoshi amshir mesüra ozüng alema amshir, itemji takum tepiyong tepuokdak ayutsü, ta shia lir.

Mussarat ya tai maket, kechiaser atsü inyaksang tenati jana bendena rondokba nung temeshi kaket dena aliba memetet, ta Rakha-i ashi.

"Mapa inyaker anaprong ya azüngtsü aser zülutsü memetet aser iba mapa ya asaa inyakba masü ta metetaka police temi pua tamangba yimsü mezüngmeshiba ken o benokba ya kanga tia maka. Court ajanga Mussarat bail nung chioktsü imlar aser la dak nungi ken o tesashi agientsü merangtsü, kechiaser lai tamangba yimsü mezüngmeshitsü tejangraba mali ta jangja-jangja sayur."

Bibi ya jala asem lir, ana kibong kumogo aser tanutsüla ya arishi küm 14 lir aser tetsü den alir. Bibi kinungbo Barkat Masih ya kasa school nung tesayur tejangdang pa asüba sülen government service rules nung aliba ama school nung office mapa inyaktsü la anioka liasü.

"Lai azüngtsü aser zülutsü memetetba ajanga la nem tesayur mapa magütsü. Onoki yangji Muslim nunger tanishir kar den jembir aser parnok teyari nung ken o bentettsü imlar. Tangbo iba yimsüng nung aliba danga Khristan kibongtem asoshi timtem mali, kechiaser nübur timbai Mussarat aser Muslim nungba yagi asaa temeshi kaket rondok masü ta

meteta lir," ta Sahotra-i ashi.

Okatsür ana yagi tan hopta bail atema application agütsütsü ta ashir, kechiaser taoba hopta Muslim nunger Eid al-Fitr benjong mechi court tem shibanga liasü.

Pakistan nung nisung noklang aoka tamangba yimsü mezüngmeshiba ken o nung tepuokdak yua lir, kechiaser obendanger temi ken o jembiba nung atsülanger aser parnok anema mapa tamajung inyaktsü tsübor.

Open Doors' ajanga alima nung Khristan ka alitsü asoshi tamajungtiba linük 50 asadanga 2023 World Watch List nung Pakistan ya jengang tenet buba nung lir, koba taoba küm jengang ti buba nung liasü.



April 21 nungi 23, 2023 tashi Mokokchung Town Baptist Arogo ajanga Tuli Lenten Baptist Arogo nung Father School agidang tangokba noksa ka angur. Iba sentong nung tebutem 62 tashi dena kanga dang takok ngua tembangogo. MTBA nungi tesayur Rev. Temsüwati Kichu (Associate Pastor) aser Mr. I. Temsü Jamir nati iba sentong kanga temoatsü ngua agia liasü. Iba osang ajanga Tuli Lenten Baptist Arogoi Mokokchung Town Baptist Arogo dang kanga pelaba lemsateper ta TLBA Pastor Rev. C. Tongpang-i sangdong ka nung metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Prangbong

(n) injang inoker akhaba oset (gun)

* Prangbong agi shiruru aser ozüsangnu makhatsüla.

Pret

(v) tesangwa yalokja lashishi (flash)

* Yasüng asen yimtak tsüngpret **preta** tzünglu tulu aru.

OLONG PAITEP # 6496

15x15 crossword grid with numbers 1-18 indicating starting positions for words.

TIPIEN

- 1. Inyaker ajangtelba - (3)
2. Bangsemo adokdak - (5)
3. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S _ _ _ _ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. _ _ _ hi - (3)
16. Akümüli nungi pilar - (3)

OLONG PAITEP # 6495 TELANGZÜBA


TIPIEN :

- 1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen, 14. Ola,
16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioiktsü,
5. Lenti, 7. Tajangzük, 11. teronem,
12. Sempa, 13. Jahaz.

**Agüja aliba noksa nung meputepi
aliba 5 bushiang**



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirimiyim@gmail.com nung yokang mesüra Tir Yimyim bureau tem nung agüjang.

IB aser Punjab Police-i Amritpal Singh dang asüngdangya asü



Dibrugarh, April 25, 2023

(Agencies): Mongulbarnü IB aser Punjab police külem telok kati Dibrugarh Central Jail nung Khalistan lennir aser 'Waris Punjab De' tanishisang Amritpal Singh dang asüngdangya asü.

New Delhi nungi IB telok ka Amritpal Singh dang asüngdangya asütsü atema aru ta osang angazüker.

Külen, Punjab police ya Dibrugarh nung arua mongzüka lir.

"Parnoki Amritpal Singh dang senotsü aser pai foreign agencies o Pakistan spy agency ISI den tesentaktep aliba indang asüngdangya" ta osang ajanga ashi.

Ano, RAW aser NIA telok ka Dibrugarh-i arua Amritpal dang asüngdangya asütsü akok.

Amritpal Singh ya Dibrugarh

Central Jail nung 'solitary confinement' kübok yua lir.

April 23, 2023 nü Punjab kübok Moga district nung Punjab police-i Amritpal apu.

Amritpal dak alia 'Waris Punjab De' züngsem 9 tashi March 19 nungi Dibrugarh jail nung puoka lir.

"Amritpal Singh nem Punjabi chiyungsü agütsür" ta osang ka ajanga ashi. Pa ya National Security Act (NSA) kübok tai tonglojka lir.

Amritpal Singh den yariteper nisung 9 ya Daljeet Singh Kalsi, Papalpreet Singh, Kulwant Singh Dhaliwal, Varinder Singh Johal, Gurmeet Singh Bukkanwala, Harjit Singh, Bhagwant Singh, Basant Singh aser Gurinderpal Singh Aujala nunger lir.

Dibrugarh jail ya kanga dang

tashi itta yanglua lir aser CCTV cameras enoka lir. Talisa Khalistan pusemertem puokba sülen CCTV cameras 69 tashi enokogo.

Assam police indang elite Black Panther commandos ajanga internal security repranger aser CRPF, Assam Police o prison guards ajanga inner security ketdangsür.

1843 küm British sorkari Central Jail tesem nung okadak ka yanglu aser iba ya Bisagam Singpho indang ken o angadangsü atema liasü.

Singpho apuba sülen Upper Assam nung Deputy Commissioner David Scott-i iba tesem ya okadak ama melen aser ibaji tang aliba Dibrugarh Central Jail indang ward No. 1 liasü.

Gunotsav 2023 kübok Sivasagar district-i mezüngbuba jenjang angu

Guwahati, April 25, 2023

(Agencies): Assam Chief Minister Himanta Biswa Sarma-i Mongulbarnü Gunotsav 2023 indang results metetdaksüogo.

Assam nung school infrastructure aser quality of education tajungba kümdaktsüba atema pelar ta CM Sarma-i ashi.

Gunotsav 2023 results nung

Sivasagar-i mezüngbuba, Charaideo-i tanabuba, Golaghat-i tasembubua aser Majuli-i pezübuba jenjang takoktem angu.

Gunotsav ya Assam nung education system asadanga maparen ka lir aser iba nung teacher-student ratio, infrastructure, teaching methodologies aser student performance repranger.

Assam nung Gunotsav 2023 nung shilem agiba school 19,172 nungi school 11,000 temai A+ grade ngutetogo.

CM Sarma-isa A+ grade anguba school ajak nem Rs 25,000 teyari agütsütsü metetdaksü.

Paisa Assam nung C aser D grade schools ajak B grade tashi ajungkettsü atema merangtsü ta metetdaksü.

Trinamool Congress-i Assam nung jenjang atuba anema campaign tenzüker

Guwahati, April 25, 2023

(Agencies): Trinamool Congress indang Assam unit-i April 25, 2023 nü kechisarena nung jenjang atuba anema social media campaign ka tenzükogo.

"Assam nung TMC unit-i jenjang atuba anema social media nung campaign ka

tenzükogo" ta Assam nung Trinamool Congress lennir Ripun Bora-i ashi.

2014 küm Assam nung BJP sorkar akümba sülen state nung nüngdakba ajak nung jenjang tuogo aser sorkari iba ya mazioker, ta TMC lennir Bora-i ashi.

Külen, Trinamool Congress

(TMC) indang National General Secretary Abhishek Banerjee-ia Bengal kübok BJP tashi aliba tesem Coochbihar nungi 'Jono Sanjog Yatra' tenzüker.

Banerjee-i North Bengal kübok Coochbihar nungi South Bengal kübok Sagar tashi iba sentong agütsü.

Manipur nung KYKL-i 29 buba Foundation Day among

Imphal, April 25, 2023

(Agencies): Mongulbarnü Manipur nung Kanglei Yaol Kan-na Lup (KYKL) indang 29 buba Raising Day among.

Kümshia amongba ama KYKL-i central headquarters (CHQ), battalions, units aser Kangleipak (Manipur) nung aser tangalen aliba tasections ajak nung iba anogo among, ta

Publicity and Research Secretary A Yaiphaba-i ashi.

CHQ nung amongba sentong nung party flag atsüket, taküm bendanga agütsür nem naru yuja tetushi agütsü aser KYKL chairman indang osang zünga metetdaksü.

KYKL lennir aikati 'object' ama mesüi 'subject' ka ama

alitsü nüngdakba osang metetdaksü.

Northeast India, Bhutan, North Bengal aser Myanmar dena 'Western Southeast Asia' (WESEA) region nung telungpur teloktem, civil society organizations, public lennirtem, shisashirtem aser media fraternity dang kanga pelar, ta KYKL chairman N Oken-i ashi.

US Tir Joe Biden-i 2024 election nübuyim sentong tenzükogo

Washington, Rongchii/April 25 (Agencies): US Tir Joe Biden-i 2024 election nung tanaben tokteptsü sangdongogo, anungji ano Donald Trump den sa ano tokteptsü amai sapang ka yanglur.

Democratic telok nungi Biden ya küm pezü kümsük tanabuba asoshi tokteptsü imla liasü aser pa nübuyim Mongulbarnü video ka ajanga tenzük.

"Nüjiso aser temeden lendong nung lir. Pei kisüing atema bilema alitsü mapang masü. Iba yongji ni tokteper," ta pai ashi.

Arishi küm 58 tain Vice-President Kamala Harris ya ano maneni pa indang running mate asütsü, tetetzü la maneni vice-president atema tokteptsü.

Arishi küm 80 tain Biden ya US puti otsü nung tir tambutisang lir aser pa nübuyimba mapang pa indang arishi küm atema tasüngdangba ajurutsü amai lir. 2029 küm pa kümsük tanabuba tembangdang pa arishi küm 86 alitsü.

"Nüburtemi kü arishi küm indang jembitsü ya tim dang lir. Aser ni ashitsü ajak agi, ni repranga liang," ta pai küm tetenzüklen shia liasü.

Biden-i 2020 küm Trump den toktepa liasü aser United States indang tanüla tanaben asendenshidaktsütsü nangzükba sülen Republican telok nungi Trump madak takok angu.

"Küm pezü tejakdang ni tir asoshi toktepdang ni asenok America tanüla asoshi tongpang nung lir ta shia liasü aser tanga asenok yangji lir," ta Biden-i minute asem agia sangdongba video nung ashi aser iba mapang

pai America nunger nisung balala ajuruba sayua liasü. Iba video nungya 2021 küm Biden-i takok anguba result melenshitsuüsü meranga Trump bukumer temi US Capitol telungi ia amakba indang noksa tema sayua liasü.

Trump-a tir asoshi nübuyim tenzükogo, anungji November 5, 2024 nü tena maneni ajuruteptsü teimla sayur. Nominations nung tenaprongi takok angutsü amai züingshir saka Trump den Florida Governor Ron DeSantis nunger ama nübu temi tokteptsü.

"America nunger puti otsü nung tamajungtiba tir pongu külemi yutsü nunga Joe Biden-i teraksa bener arutsüba meyanglutetsü," ta Trump-i Hombar aonung sangdong ka nung ashi.

Mapang talangka nungi Biden-i tir election nung tanaben tokteptsü sentong aliba yimya balala agi sayua aru, saka pai kodang sangdongtsü, aji memeteti liasü. Honibar aser Deobarnü Maryland nung presidential retreat, Camp David nung teyariteper den amungba sülen 2020 küm sangdonger küm pezü anogomung nung pai nübuyim tenzüktsü sangdong.

White House nung senior adviser, Julie Chavez Rodriguez ya pa indang campaign manager ama inyaktü.

Democratic nomination atema Biden den tokteper tang tashinung kata malinung pa shimtsü ya tejangja lir.

Saka tawa polls agiba nung pa tokteptsü telemtetba agiba yagi party telungzük aser linük nung telemsa adoktsü ama

sayur. Hopta tatemlen NBC News poll agiba nung America nunger shilem 70, Democrats tesadang ka dak tali agi pai metokteptsüla ta ashir.

Biden indang arishi küm nung ajemdaker timbai metokteptsüla ta ashir. Shilem 48-i pa indang arishi küm ya tebilemtsü tulu ta ashir.

Pa indang approval ratings ya tera agi tamajungba lir, saka taoba küm tatemlen midterm elections nung par party-i imlaba dang nungi tajungba asayatetba ajanga Biden teimla ulushi.

Pa indang nübuyim nung tasü ita jembitsü onük kar lir, aser item rongnung sen trillion \$1.2 indang infrastructure bill aser Russia-i amak tenzükba sülen anüolen linük tem anir Ukraine yariba densema lir.

Democratic nomination atema candidate ana sangdonga lir - bestselling self-help author Marianne Williamson aser anti-vaccine activist Robert Kennedy Jr.

Par party nung tokteper tejangja maliba ajanga Biden-i tetsükdaksü kecha majurui pa indang candidate sangdonga liasü.

Pai sangdongba nung telangzüba agüja Republican Party ajanga sangdong ka nung, Biden-i tesüiba küm pezü tsüngta timtem balala adokdaksür tanaben shimtsü langa lir ta bilemba ya kanga meshidak, ta ashi.

Party indang national committee chairwoman Ronna McDaniel-i, 2024 küm pa tsükdaksütsü asoshi lar party renema lir aser Biden renemer aoba anogo US sensoi repranga anogo azünger, ta ashi.

US-i Ukraine nem USD million 325 alang prangbong hadir agütsütsü

Washington, Rongchii/April 25 (Agencies): Tri Joe Biden indang administration-i USD million 325 alang military teyari Ukraine nem agütsütsü ta sangdongogo. Hadirtem rongnung High Mobility Artillery Rocket Systems (HIMARS) injang talila aser advanced missiles aser anti-tank mines tem densema lir.

2022 küm February ita nungi Russia-i Ukraine amak tenzükba sülen US-i tang agi 36benbuba Ukraine nem teyari agütsür aser Kyiv sorkar nem military teyari agütsüba ajak senteper USD 35.4 billion jungogo.

"Security assistance package nung US-i agütsüba HIMARS atema injang talila, artillery rounds aser anti-armor systems, prangbong hadir tilatem, logistics support vehicles, aser maintenance support essential densema lir aser iba ajanga Ukraine sepaitem tashi itshidaktsütsü," ta S. Secretary of State Antony Blinken-i ashi.

HIMARS ya gari nung amenoker akhaba missile launcher ka lir aser iba yagi mapang tatsüka tsüngda guided missiles aika khateter. Ukraine

nem agütsüba missile tem ya mile 50 tashi khateter aser Ukraine nunger sepaitemi iba hadir ya kanga takok ngua amshia arudar.

"Russia-i tanü rara tembangdaksütsü koka lir. Russia-i rara metembangdaksü tashi United States aser onok den longjemer aliba linüktemi Ukraine den mapa kobika südir süaka longjemer nokdaksü," ta Blinken-i ashi.

HIMARS injang dak alia teyari agütsüba rongnung artillery rounds; tube-launched,

optically-tracked, wire-guided (TOW) missiles; anti-tank mines; port & harbor security equipment, and prangbong tila nung amshiba injang million 9 dak tema densema lir, ta Statement Department otongdar kati ashi.

Iba teyari ya Presidential Drawdown Authority, mesüra PDA senotsü agüja agütsütsü. PDA yagi jongdak mapang Congress nungi articles aser services agütsütsü asoshi tir nem tashi agüja lir.

MENUNGRA BILEMTETER



LATE MRS. RONGSENKOKLA (WAROMUNG)
01.04.1945 - 26.04.2022

Nai onok doktsür or tanü küm ka ajunger, onoki nü temeim mamateter. Anungji nü temeim bilemteta Tsüngrem nem tenüngsang agüja sarasademer.
~Temeim Kinungbo, Chirnür aser Semchirtem.

ASÜKU LEMSATEPER



ASO: 24-09-1995 **ASÜ: 15-04-2023**

Ozüi teti meima aliba tanur asür **Imnatoshi**, (Mr. L.Chuba Jamir-er jabaso), ajungben lendong ajurua taküm tembanger shisa-rama mulung zürep nüktzü mangyim mulungku tia nung alidang, onok asoshi khuret benja temeim sarasadem, nübu aser mapang den ali rongsen tenla jenti agi lokti aser kija kibong shirnokisa yariogo, ozü kinunger ajaki kangasa pelar. Tsüngremi nenok ano tali moajang ta ozü sarasadem.

Ajak dak alaka item lokti aser kija ya metetshi melitet nung nenok mapa tajung mulungnena pelaba lemsateper;

1. Longjang Baptist Arogo aser department balala,
2. Mongsen Gospel Telok,
3. International Prayer Center Khutak,
4. Longpa Village Council,
5. Süngratsü Village Council,
6. Asangma Village Council,
7. Molungkimong Village Council & VDB,
8. Govt. Polytechnic Sedem Tuensang,
9. Longjang Senso Telongjem Mokokchung,
10. Dimapur Longjanglar Telongjem,
11. Longjang Lanur Tata Yangalar Telongjem,
12. Longjang Jamir Kidong Telongjem,
13. 4 Buba Zünga Longjang,
14. Longjang Medemsanger Putu Menden,
15. Shri. T.N. Manen IAS (Retired),
Advisor Law & Justice Land Revenue Govt. of Nagaland.

~ Tsürabur, adianu aser kinungertem.

SANGDONGER

40 Buba Forest & Raw Materials Contractors' Association Tuli, küm tatem General Meeting sentong April 28, 2023 anogo 10:00 A.M. nung Association Conference hall nung agitsü sentong yanglua lir.

Anungji, iba anogo nung F&RMCA züngsem ajak absent mesüi arua atentsü osang agütsür.

Sd/- **Sd/-**
CHUBATEM JEN LEMTUR **R. MOLUNG IMSONG**
President **General Secretary**
F&RMCA **F&RMCA**

IDBI BANK LIMITED. Zonal Office : IDBI House, 44, Shakespeare Sarani, Kolkata - 700017, Website: - www.idbibank.in, CIN-L65190MH2004GO148838

TENDER MESHIA SANGDONGER

WEST BENGAL, SIKKIM & NORTH EAST INDANG STATES TEM NUNG ALIBA OFFICES/ BRANCHES AOKTSÜ & MUREKTSÜ ATEMA AOKTSÜ & MUREKTSÜ ASER DANGA INYAKSANGSHI ASOSHI SERVICE AGÜTSÜR DANG ANNUAL MAINTENANCE CONTRACT ATEMA PRE-QUALIFICATION MESHIR

Item mapa atema service agütsür dang nungi pre-qualification atema sealed Applications meshir. Tali tejangja atema Bank indang website <https://www.idbibank.in/> nung (mesüra 033-66557711/66557608) ajanga angutsü. Application agütsütsü atema May 6, 2023 nikongdang 03:00 ako tatem asütsü.

Note: Ano temelenshitsuüsü/ anogo atsülangba/ jangjashiba/ shia aliba tender dak sendakba nung bidders temi asüngdangba langzütatem website <https://www.idbibank.in/> nung dang metetdaksütsü aser osangkaket tem nung sangdong balaka magütsütsü.

Date : 26.04.2023 **GM (Deputy Zonal Head)**

ALI TAYOKTSÜ LIR

Nihoto nung ali plot asem ayoktsüba lir:

1. Square feet nung Rs. 135
2. Square feet nung Rs. 180
3. Square feet nung Rs. 160

Contact No. 9362194700

ALI TAYOKTSÜ LIR

Ao Yimkum, Dimapur
2 Bighas, 200/sq.ft.
Phone Number: 9612071247



Wrestler Vinesh Phogat, Sakshi Malik, Bajrang Punia aser tangartem taoba Haryana CM aser Congress lenir Bhupinder Singh Hooda den Jantar Mantar, New Delhi nung tangokba noksa nung angur.

BAI-i Asian Games Team shimtsü atema asayartem jaokogo

Rongchii/April 25, 2023

(Agencies): Badminton Association of India (BAI)-i, taruba Asian Games atema team shimtsü asoshi May 4 nungi 7 tashi selection trial ka agitsü asoshi telemtetba agiogo.

Asian Games, koba taoba kum September ita agitsü liasü iba asayamung ya takum September 23 nungi October 8 tashi Hangzhou, China nung asayatsü.

State associations tem nem osang agütsüba nung trails ya Telangana nung Jwala Gutta Academy of Excellence nung agitsü ta shia lir.

April 18 nü tashi nung BWF Top 20 ranking list dak ajemdaker PV Sindhu (World No. 11), HS Prannoy (world no. 9), tebur tarep asayar Chirag Shetty and Satwiksairaj Rankireddy (World No. 6) aser tetsür tarep asayar Treesa Jolly aser Gayatri Gopichand (world no. 19) nunger Asian Games atema indang indaga

shimogo.

World championships silver aser bronze medallists Kidambi Srikanth (World No. 23) aser Commonwealth Games champion Lakshya Sen (World No. 24), Orleans Masters Super 300 champio Priyanshu Rajawat, national champion Mithun Manjunath aser Tokyo Olympian B Sai Praneeth nunger team nung jenjang ka atema trails nung tokteptsü.

Tetsür kija asaya nung London Games bronze medallist Saina Nehwal, Aakarshi Kashyap, Malvika Bansod, Ashmita Chaliha, Unnati Hooda nunger tokteptsü.

"Trails nung shilem agitsü atema April 28 nü nikongtsütsü 5:00 ako tashi nungbo BAI nem osang tejangja agütsütsü nungdaker," ta BAI-i shiti nung shia lir.

"Trails atema format ya deadline sülen yanglutsü."

Asian Games 2023 selection trials atema

asayartem:

Tebur kija asaya: Lakshya Sen, Kidambi Srikanth, Priyanshu Rajawat, Mithun Manjunath, Sai Praneeth, Maisnam Meiraba, Bharat Raghav, Ansal Yadav, Siddhant Gupta

Tetsür kija asaya: Saina Nehwal, Aakarshi Kashyap, Malvika Bansod, Ashmita Chaliha, Aditi Bhat, Unnati Hooda, Alisha Naik, Shriyanshi Valishetty, Anupama Upadhyay

Tabor tarep asaya: MR Arjun/Dhruv Kapila, Krishna Prasad/Vishuvaradhan, Suraj Goala/Pruthvi Roy, Nithin HV/Sai Pratheek, Kushal Raj/Prakash Raj

Tetsür tarep asaya: Ashwini Bhat/Shikha Gautham, Tanisha Crasto/Ashwini Ponnappa, Radhika Sharma/Tanvi Sharma Mixed Doubles: Rohan Kapoor/Sikki Reddy, Sai Pratheek/Tanisha Crasto, Hariharan/Varshini, Hemagendra Babu/Kanika Kanwal.

WTC Final atema India Squad sangdongogo

Rongchii/April 25, 2023

(Agencies): Australia den asayatsü aliba World Test Championship final atema BCCI-i India team sangdongogo.

Ajinkya Rahane tawa kanga junga asayaba sülen ICC World Test Championship final atema team nung züngoksemogo, koba The Oval London nung June 7 nungi 11 tashi asayatsü.

Shreyas Iyer teberem yiruba ajanga masaytetsüsa akumba sülen Rahane team nung züngoksemtsü imla liasü. Pa Ita 15 sülen tang team nung züngoksemogo.

Rahane tatamsa 2022 kum January ita South Africa den Cape Town nung asayaba asaya nung pa asaya liasü.

BCCI selection panel, den

captain Rohit Sharma aser Rahul Dravid nunger Hombarnü nikongtsütsü ajurutepa team shimogo.

Board-i Mongolbarnü sangdongba squad nung R Ashwin, Ravindra Jadeja aser Axar Patel ta spinner asem, Shardul Thakur, Mohammed Shami, Mohammed Siraj, Umesh Yadav aser Jaydev Unadkat ta pacer pongu densema lir.

Rahane ya tajangshiba aika aliba dak ajemdaker shimogo, kechiyong India team SENA linüktem den asayaba mapang tetsükdaktsü adokba khenbo ajangshio.

Arishi kum 34 tain asayar yagi anir Mumbai team anir domestic season ajunga asayaogo aser pai run 700 shi yanglua liasü, ajüsüa pai tang

IPL nung asaya yimya melenshia asayaba ajanga pa team nung züngoksemtsü atema jenjang junga kumdaktsüogo.

Team nung wicketkeeper KS Bharat asütsü, kechiyong Rishabh Pant tang tashi temang manemi lir.

Ishan Kishan, Suryakumar Yadav aser Kuldeep Yadav nunger India nung Australia den asayaba mapangbo team nung densema liasü saka tang meshim.

INDIA SQUAD: Rohit Sharma (c), Shubman Gill, Cheteshwar Pujara, Virat Kohli, Ajinkya Rahane, KL Rahul, KS Bharat (wk), R Ashwin, Ravindra Jadeja, Axar Patel, Shardul Thakur, Mohammed Shami, Mohammed Siraj, Umesh Yadav, Jaydev Unadkat.

Odisha sorkar aser Hockey India na tenangzüktepba yanglushi

Rongchii/April 25, 2023

(Agencies): Odisha sorkari India National Hockey team 2023 nungi 2023 tashi ano kum ter sponsor asütsü mulunga agizükogo. India tetsür aser tebur National Hockey Teams (Senior & Junior) sponsor asütsü atema tenangzüktepba atsülangshitsü atema State Cabinet-i agizüka liasü.

Odisha sorkari National Hockey Team tem 2018 kum nungi sponsor süa aruogo. Iba telongjem ajanga India nung Hockey renloka aoba nung tongtibang shilem agitsü.

Taoba mapang sorkar nungi temelaba anguba sülen Odisha Mining Corporation Ltd. (OMC) aser Hockey India na Hockey Team tem kum pongu atema 2018 nungi 23 tashi sponsor asütsü asoshi tenangzüktepba ka yanglua liasü.

Hockey India tir-i iba tenangzüktepba atsülangtsü atema mepeshiba sülen OMC Ltd.-i sorkar dang temelaba meshi aser Cabinet-i Hombarnü temelaba agütsüogo. Tang

OMC-i India team 2023 kum February 1 nü nungi 2023 kum January 31 tashi sponsor asütsü. Kasa mapang nung OMC-i kum ter tsungda Hockey India nem sen crore 434.12 agütsütsü.

State aser Hockey India na longjemba ajanga linük nung iba asaya asüngsashiba tongtibang shilem agiogo. India tetsür aser tebur team napronglai taoba kum ishika tsungda kanga junga asaya arudar. Tebur team-i kum 41 sülen Tokyo Olympics nung mezüngbuba bronze medal angu aser tetsür team-a iba asayamung nung mezüngbuba semifinal tonga liasü.

Kum ishika tsungda Odisha sorkar den longjemba ajanga iba asaya state nung kanga nungtugu kumogo. Sorkari tang lanurtem tali atsüa arua linük asoshi asayartem anitetsü atema iba asaya ajungkettsü nükjidong lir. Maneni iba telongjem ajanga Hockey asaya nung Odishia kanga nungtugu kumogo aser iba ajanga asaya, business, aser tourism sector kanga renloka odar.

Tottenham-i interim manager Stellini mapa nungi anentsü



Rongchii/April 25, 2023

(Agencies): Tottenham Hotspur-i interim coach Cristian Stellini mapa nungi anentsüogo, ta Premier League club yagi Hombarnü sangdong ka ajanga metetdaksü.

Newcastle United pur goal 6-1 agi mekoki parnok top four nung tembangtsü atema asaya aliba nung tetsükdaktsü tulu adokdaksüba sülen iba jenjang agia liasü. Club-i permanent manager ka den director of football ka shimtsü asoshi maneni bushiba mapang Assistant coach Ryan Mason-i head coach mapa bena atatsü.

Stellini-i coach mapa ya Spurs pur jenjang pezübuba nung aliba mapang taoba ita Italy nunger coach Antonio Conte ket nungi agizük. St James' Park nung tamakok anguba sülen parnok Newcastle aser Manchester United dang nungi point trok agi tajemba lir aser asaya-a parnok timba asayar lir.

"Deobarnü Newcastle den asayaba yimya ya khenyongi agizüktsü makoktsü," ta club

mendenbuba Daniel Levy-i ashi.

Mason tang agi tanabenbuba interim coach kumogo. 2021 kum April ita Jose Mourinho den pilaba mapanga pai interim coach mapa agizüka liasü.

Stellini ya Conte indang managerial staff nung liasü aser Conte gallbladder surgery agiba ajanga asaya aika nung shilem magitetsüsa akumba mapang pai anir team asaya liasü.

Conte maliba mapang Stellini-i anir Spurs puri Manchester City, West Ham United aser Chelsea madak takok ngua liasü.

Ajüsüa Conte melenba sülen pa lenisüba nung Spurs puri Brighton & Hove Albion pur dang akok aser iba ita tetenzüklen Bournemouth pur mekoki liasü.

Taoba Bayern Munich coach Julian Nagelsmann-i coach mapa belenzüktsü imlar aser kasa mapang nung Burnley coach Vincent Kompany-a asadangdar.

Feyenoord coach Arne Slot aser Leicester City manager Brendan Rodgers nata iba mapa atema sendaktepa liasü.

British media sangdong balala ajanga taoba Spurs coach Mauricio Pochettino-i Chelsea coach mapa belenzüktsü atema sensaksemdar ta metetdaksüogo.

Spurs pur taruba asaya Manchester United den Brehostibarnü asayatsü.

BILEMDANGANG

"Ochi jembir atema pai jembiba o bilemtetshitsü nungdak madoker."